

地330.37

1991

部

始興縣鄉土志

三度
二十分

三度
二十分

四度
四十分

四度
五十分

三度
十分

三度
五十分

三度
五十分


四度
五十分

始興圖

宣統元年
月吉日

年孟春
製

沙田縣界



韶州翁源縣界

始興縣鄉土志序

鄉土志非節錄邑乘之謂其謂按切時事黜華崇寔提其要引其機授受初學歷史地輿格致三科及山川人物就近指示淺顯易明俾兒童隨地隨事感悟其天性激發其愛鄉愛國尊崇正業之思想養成上流社會人格此其宗旨也若以班香屈艷繩之失其例矣始興建自吳永安六年歷晉魏齊梁無間隋有麥鐵杖武職也唐開元二十二年徵拜張九齡中書令同平章事南人入相自公始當是時元宗詔封始興伯王維有上始興公詩天

下無論遐邇咸知有始興焉自宋迄明如譚大夫煥譚尙書大初陳都御史德文代有偉人

國朝康熙乾隆間戴主事珮徐孝廉錫元黃進士有覲林太史明倫尤爲卓卓方今

上諭廣育人材振興新政詔天下徧設學堂以教授童蒙爲基礎但教科伊始必有以引其知覺濬其智慧觸其忠愛之悃忱非由淺近導入曷臻精深此鄉土志一書徧行省府廳州縣各宜按日考查依例採錄也始邑僻處偏隅風氣未開舊有邑志成豐四年遭兵燹片板無存難資參攷謹依所頒例

目按次撰輯歷史照舊訂正昭其慎也政績附錄
近人爲守土紀實蹟也兵事專詳五十年內防亂
階也耆舊各取其長名臣名儒忠節循吏等類採
舊史掇家乘擇其尤也戶口氏族宗教人類不齊
示其辨也士農工商各有實業分紀之重國本也
地理分內外約註明毗連四區俾童年熟悉匪特
不忍輕去其鄉且知中國疆土不可尺寸與人預
養其尙武精神期能強立於全權世界保種也動
植礦物各產商務雖少特別然能改良進步則商
戰競勝可以挽利權裕國課塞漏卮是爲急切關

繫謀國者急宜開其源也帙旣成爲擬小學計他
日升中學入大學忠君報國此其嚆矢也彼世有
胸羅全史曾不足以興一利除一弊行政於一郡
一邑者其視鄉土志爲淺近奚怪焉時光緒丁未
秋月里人張報和序於勸學所東廂

始興縣鄉土志

里人張報和總纂

何慶齡 李玉勳
李賢偉 陳模
胡壽頌 陳及時

編纂校訂

歷史

始興自秦開置表至三國永安六年分曲江地置始興縣始興之名自此始

本境未置以前唐虞夏商周屬揚州之南境春秋為百粵地戰國屬楚秦為曲江地屬南海郡秦末趙佗據之稱南越

漢元鼎五年平越以曲江隸桂陽郡元豐五年置

始興縣鄉土志

清廷文苑印司承刻

十三郡刺史復以桂陽屬荊州三國鼎分魏得荊州赤壁之敗遂入於吳

吳黃武五年置廣州其地屬廣州

本境未置以前屬百粵屬楚屬南海郡屬南越改隸桂陽郡復以桂陽屬荊州鼎分於魏魏敗遂入於吳要皆禹貢揚州之南境也

本境置自吳永安六年分曲江地置始興縣始興之名始此甘露元年分桂陽南海二郡地置始興郡統曲江始興等七縣分置原境為斜階縣屬焉晉大康七年以始興郡屬廣州永康元年分始興

郡置湘州咸和三年復以始興郡屬荊州永和元年春三月以廣州始興屬義揚郡

宋元嘉二十九年以始興臨賀始安三郡屬廣州元徽四年更始興郡爲廣興郡

齊革廣興郡復名始興郡領縣十隸廣州更始興縣爲正階縣梁天監元年置衡州於浚光縣地分廣州之始興等郡隸之未幾建東衡州於始興縣地而始興郡屬焉尋廢東衡州

按天監初廢置不可勝紀分始興縣爲安遠郡分正階縣曰始興縣承聖初又以始興爲衡州尋廢

陳大建二年復置東衡州

隋改衡州曰淮州開皇九年廢始興郡以其地屬廣東總管府

按隋書是年省諸郡於始興郡置廣州總管府統縣十六始興在焉又分始興縣置大庾縣二十年移廣東總管府於南海尋廢大庾入始興縣

唐武德四年分廣州之曲江等縣置韶州始興屬焉光化元年分始興縣置浚昌縣天寶三載改韶州爲始興郡尋廢

五代南漢乾和四年分韶之始興浚昌二縣置雄州雄州之名自此始

宋開寶四年潘美平嶺南克雄州以屬廣南東道更名南雄以縣隸焉屬廣州

以河北亦有雄州故加南字以別之南雄之名始此

元至元十六年改南雄州爲路隸廣東道宣慰司都元帥府屬之

明洪武元年更南雄路爲府隸廣東布政使司領保昌始興二縣

國朝嘉慶十二年改府爲直隸州隸始興一縣

政績錄

宦本境者唐宋寥寥逮明迄今其於興利去害聽訟三大端實有足記者爰仍例以紀之

明

張士國莆田人洪武元年任知縣兵燹之餘百事

草創仕國撫瘡痍宏惠鮮興作而民不擾

見祀名宦

王起洪武甲戌任知縣築陂塘興水利民並賴之

至今呼其陂曰王知縣陂

見祀名宦

陳山沙縣人永樂中爲縣教諭以育才爲已任亶亶盡心諸生多成就者用薦超擢吏科給事中累官戶部尙書謹身殿大學士

見祀名宦

楊立宏治中任清化巡巡檢勦賊有功常捐俸平清化灘石開山谿險路行旅便之

楊應隆雒容舉人萬歷二年任縣令大有風裁長於應變而案無留牘獄不稱冤勸里甲勤務農業

修城築隄置學田建先賢祠宇厥績彰焉

李繼華福建晉江人萬歷九年任邑治老成持重捐去繁苛務存大體至清丈田畝均派官民二則視舊減輕衆皆便之又喜周恤寒士至捐俸爲完聘朔望與諸生講析書義曲盡名理刊所著折衷一書以廣教澤凡諸生有不肖勉令自新士皆嚮化焉

蔣希禹全州舉人萬歷二十年任縣令定丁糧條鞭式民樂其平建文昌閣使多士肄業其中創獅石浮屠以固形勝修訂志書有功於邑

朱泗澄海人萬歷間任教諭行誼敦厚古處勵士崇尙節概不爲長揖迎接之行不憚上臺譴責之威士風頓舉賴公之化焉

國朝

錢升字日庵順天大興人也乙未進士順治十三年任知縣潔已不阿節省均糧憐恤孤寡口碑載道在位一載行取授刑部主事

鮑復顯三韓人監生康熙十九年知縣事凡五載倡新學宮修葺城垣革里挑承役詳豁協幫凌江驛夫船免地方答應柴火嚴緝匪盜民困賴以甦

丁繼母艱未幾以疾卒於別館其子鐸扶櫬回旗士民議祠祀之有餘慕焉

毛德琦浙江貢生康熙三十五年任縣令廉明有局幹邑永興庵僧默阿有邪術挾怨者授以金能咒人死察得其實杖斃之流寇屯聚沙子嶺官兵勦之爲所敗德琦率鄉兵力禦寇乃遁境賴以寧在位十四年吏翕民安以憂去邑人立祠祀之起復歷鎮江大守

孫桂江南青陽縣拔貢乾隆甲子協辦縣事乙丑署任廉明強幹愛育人才拊循有術嚴飭胥徒需

索有訟立判案牘無遺用刑頗重而受刑者莫不輸服去任日童叟夾道留靴隕涕以不能久借寇公爲恨

廖名揚江西拔貢乾隆十六年署縣令勤敏練達政務曉暢不寄耳目弊絕風清甫蒞數年積案剖決冰銷語人曰謹謂民頑聽訟者得其平自不犯有司耳竇禮賢士愛恤人材數月調任士民送者盈路咸嘆惜之

圖爾兵阿正黃旗舉人乾隆十六年任縣令精明寓以渾厚廉介濟以和平悃悃無華不尙苛察息

事寧人謙恭禮士民有爭訟辨斷曲直仍多方訓迪務期化僞爲良以廉能調新會縣士民遮道祖餞再三慰諭揮淚而別

鄭模順天舉人乾隆戊寅任縣令甫下車營修書院卜城東吉地建

萬壽宮謙恭下士潔已愛民徵收則革淋尖平斛面折獄則明如鏡捷如雷力鋤城狐澄清蠹役不數月而境賴以寧未幾以丁艱去士民遮道立碑記之詹能績浙江遂安縣副榜乾隆二十八年任殷勤教化一私不染有古廉吏風三載多善政案無留

牘執法嚴明時典史賈後卿貪污劾去之士民稱快後因註誤卸任改教歸乏資斧邑人爭助之送於道留靴洒淚而別

張元愷直隸漢軍舉人乾隆四十九年任專以課士育才嚴鋤土霸愛惜良民爲重歲丁未大差迭至窘甚有勸其權行折色以通用者公毅然曰吾寧窘死決不爲此戊申七月大旱禾將槁聞歌馬祠最靈齋戒沐浴步行四十里詣祠虔禱回至中途遂大雨歷任八載多善政後以足疾疲憊調署分府卒於署貧無以殮士民間之出涕曰古之遺

愛也咸往助之哭聲載道扶輓以歸

楊桂蔭江南六安州人嘉慶五年由軍功陞邑令到任後即重修

萬壽宮慨然以振頹文風爲急因將文明書院廓而大之以壯厥觀追出龍鬬峯學山杉木充公作書院膏火時學院裁學額蒙詳請

奏覆學額仍舊在位四年革屠差鋤濫匪而盜賊遠竄以廉能調潮陽士民遮道送之

羅含章雲南舉人蒞南雄州收清丈田畝躬親勘計吏不容奸迄今州屬咸以勘單爲據民咸樂之

嘉慶二十五年憫始興原額屯米三千令二十一石五斗令五合三勺六抄其中有田荒糧存者有改屯作民無從除數者特爲詳請豁免減除准減七百六十二石二斗令七合八勺三抄外尙實額征屯米二千二百五十九石二斗九升七合五勺三抄迨後公陞遷疆吏奏請復姓歸宗粵東名宦祠所稱程中丞含章是也迄今南始兩屬祀之軍民等無不知有羅州官者仍其舊也所刊遺愛集記所浚陂不下數十處真可謂清慎勤矣

胡勳裕字茗原江蘇湖州舉人嘉慶庚午夏雨水

崩塌城垣數處頗需鉅費公蒞任後詳請

奏准脩復於嘉慶丁丑年七月興工十二月告竣公親督力役不委書丁誠盡瘁矣是年復與州牧羅公含章同捐廉倡脩胡坊陂改名元豐陂羅公碑記註田畝五十七頃八十五畝餘迄今沾灌溉之澤幸免旱災公之力也

韓鳳翔山東繡江舉人道光十六年蒞始興留心農務尤嗜栽培土類凡見鄉紳諄諄以立品相勗及校童子軍向無試院扁鎖儀門各士子自運棹椅甚屬繁瘁公觀之憮然曰考校大典豈有數百

年來尙無文場者乎爰捐廉提倡擇西門內裁缺訓導學署地基興建墨江藝苑士林賴之奉祀弗忘光緒三十一年改作學堂即其地也公聽訟無留牘每遇互控案必誨之曰士農工商各安本業豈有日赴訟庭妄思爭勝而可以起家者乎聞者生愧服其剖決如流訟事少息

李延福于道光十九年由進士授始興知縣以興利除弊爲己任凡遇訟事立刻示期裁判嘗曰吾民多一日涉訟即少一日生計因循玩公惡在其爲民父母也嘗有鉅富觸法欲進苞苴冀從輕減

公毅然曰以造孽錢貽子孫累吾家雖貧寒斷斷不爲也捐廉於十字街創立社倉買穀備荒飢年民甚賴之後因宰斯土者虧空填歛倉遂廢頽垣僅存公之遺澤今猶口碑載道云

王嘉福江蘇長洲舉人兩蒞始興值咸豐初年紅匪甫收髮匪四起所至脅從勢焰莫遏由曲江仁化竄擾始興邊界公知營兵無幾星夜飛檄募召各約鄉勇親督弁日紮駐水南地方堵禦未幾匪勢奔來臨河將渡公聞警挺身先往下令曰吾爲地殺賊萬死不避對此大敵斷不能稍退一步兵

勇等聞言奮激踴躍爭前公屹立河岸礮彈雨飛毅然不動鏖戰半日賊不得渡昏夜由對岸潛往北山踰嶺冒險竄入江西省界是役也以寡敵衆以少勝多非公素治民心奚由保全萬姓哉旋丁艱去任邑人立主祀之誠有功德於民者歟迄同治丙寅公年老罷官延公主講文明書院公精神矍鑠談文評詩晨夕無間公所栽培類多知名士其經濟文章洵不愧爲循吏之冠云

同治光緒間宰始興著政績者不少惟照祀名宦例歿未踰三十載及本身現在者不登錄闕

之以俟後來續探

兵事錄

吳建衡三年夏廣州督將郭馬等反殺廣州督虞授別遣將王族攻始興秋八月遷刺史徐旗殺南海太守劉畧吳遣將軍領廣州牧滕修討之
晉建興三年秋八月廣州刺史陶侃至始興討王機并溫邵平之

成帝咸和三年秋九月前交州刺史張璉據始興反進攻廣州鎮南司馬曾淵等擊破之

宋泰始二年春正月宋子助稱帝於尋陽廣州刺

史袁曇遠舉兵慶子助聞始興兵起遣卒戍浚陽其部將李萬周殺袁曇遠以降

梁泰清三年秋七月前高州刺史蘭裕作亂據始興郡遂攻衡州陳霸先率兵至平之以霸先監始興郡事

簡文帝大寶元年春正月以陳霸先爲交州刺史霸先發始興與蔡路養戰於南野敗走之進軍南康

陳大建二年春二月車騎將軍章昭達倍道兼行至始興擒歐陽紇送建康伏誅廣州平

宋德祐二年冬十月元呂師夔等將兵度梅嶺過始興遂入韶州

元至正二十六年丙午明大將軍平章政事常遇春駐師南安僞漢守將孫榮祖以城降

明宏治六年癸丑強賊李三奴剽掠

明嘉靖三十七年戊午春二月龍南賊犯始興石坑等處知府章援禦之敗績爲賊傷者頗衆

明隆慶元年丁卯夏四月龍南賊流劫鄉村知府周思久招撫歸業

萬歷十七年己丑始興流民黃辛滿等謀逆同知

王應麟擒滅之

崇禎四年辛未夏四月九連山賊陳萬破城執縣令荆廷鈺士民多受荼毒仍斂千金贖廷鈺歸

國朝

順治四年丁亥春正月

王師至始興江口士民出迎遂各安居復業

康熙十四年乙卯流寇楊正邦俗呼爲及余何二賊

作亂勢甚猖獗副總兵張善擊敗之

道光三十年庚戌滸江匪徒黃毛五等聚嘯山廠出沒無常遂由清化構衆起事劫鄉攻圍乘機延

蔓周所頓岡及太平墟等處雖幸救援撲滅解散然承平日久聞風胆落所失貲財難以億計噫亂機已作自此始矣

咸豐三年癸丑龍南賊魁謝老三等煽惑亂民劫都亨掠羅坵直搗頓岡墟紮駐周所爲老巢外匪奔集內匪潛應縣城戒嚴人心驚恐幾成莫遏之勢幸潮勇來援各鄉民齊赴賊知四面受敵勢不能支遂有潰志乘其黑夜潛逃逐路追戰殲戮不可勝計否則合邑生靈不可救藥痛定思哀能勿悲哉

咸豐四年甲寅紅匪潘某等由韶府坭舖頭白土等處起旗沂流擾亂直抵始邑圍城晝夜環攻城遂陷賊踞縣署四出酷索糧米稍不滿意立肆焚劫土人降賊者衆藉勢擄搶各處餉當十餘間當是時地棘天荆幾無匿身之所風餐露宿無非枵腹之人紅羊換劫慘不忍言所幸援兵奔救南康周大少親帶練勇州牧胞弟孫福同統率兵勇倍道兼程朝發夕至出其不意星夜直搗賊巢賊四潰奔竄斬殺無數縣城克復誰之功也賊平後各鄉聯約起造圍樓爲善後計然屢遭兵燹再興土

木貧極加困何時獲使瘡痍復起誠有望於賢有司云

咸豐五年乙卯髮匪由仁化曲江闖入始興邊境通邑震動縣令王嘉福親詣水南地方堵禦躬先士卒人殊死戰賊不得渡民賴以安孰非由地方官身爲倡率哉王大令享祀不忒良有以也

同治五年丙寅夏五月潯江李廷弼俗名矮禿亂墟作反詳請上憲遣兵合剿滅之先是矮禿之兄名高禿昆季偕來炭廠路徑熟悉咸豐初糾黨成羣統賊作亂由清化境擾及周所縣前石下沈所

各處幸縣城未破遂退踞塘模崔附近山林肆行劫掠縣憲不得已出示招撫許其自新歸降後改矮禿名爲廷弼保舉把總銜委以深渡水公局准其抽收雜款護守周至清化一路廷弼因此積貲置田產造店房起圍樓幾有久居此土之意無奈賊性未除仍憤與匪類交通漸致沿途搶案疊報不休縣憲斥其溺職撤去公局免抽收廷弼遂於夏四月亂墟捉人擄店豎旗作反縣憲常維潮聞警飛稟南韶火檄各約鄉勇親詣周所墟堵禦未幾代理南雄州姚牧亦到周所統帶楚南游勇督